

**Bosna i Hercegovina
Federacija Bosne i Hercegovine
Bosansko-podrinjski kanton
Ministarstvo za urbanizam, prostorno uređenje i zaštitu okoline**



**P R A V I L N I K
O DEFINISANJU MINIMALNIH KADROVSKIH I MATERIJALNO –
TEHNIČKIH UVJETA KOJE MORAJU ISPUNJAVATI IZVOĐAČI DA BI
DOBILI LICENCU ZA OBAVLJANJE DJELATNOSTI GRAĐENJA**

„Službene novine BPK Goražde“ br. 4/10 i 8/10
Prečišćeni tekst

Goražde, mart 2010. godine

Na osnovu člana 66. Zakona o organizaciji organa uprave u Federaciji BiH („Sl. novine Federacije BiH“, br.35/05) i člana 96. stav 2. Zakona o prostornom uređenju i građenju BPK Goražde („Sl. novine BPK Goražde“, br. 15/09), Ministar za urbanizam, prostorno uređenje i zaštitu okoline, uz prethodnu saglasnost Vlade Bosansko-podrinjskog kantona Goražde, *d o n o s i*:

P R A V I L N I K
O DEFINISANJU MINIMALNIH KADROVSKIH I
MATERIJALNO-TEHNIČKIH UVJETA KOJE MORAJU ISPUNJAVATI IZVOĐAČI
DA BI DOBILI LICENCU ZA OBAVLJANJE DJELATNOSTI GRAĐENJA

Član 1.

Ovim Pravilnikom definišu se minimalni kadrovski i materijalno-tehnički uvjeti koje moraju ispunjavati izvođači za svaku granu građevinarstva, odnosno za svaku vrstu objekata i zahvata u prostoru, da bi dobili odgovarajuću licencu za tu granu, odnosno za građenje te vrste objekata, kao i uvjete za oduzimanje tih licenci.

Član 2.

Izvođač prema ovom Pravilniku je pravno lice registrovano za obavljanje poslova građenja građevina i/ili izvođenja pojedinih radova na građevini i drugih zahvata u prostoru za koje odobrenje za građenje izdaje Ministarstvo ili jedinice lokalne samouprave Kantona. Poslove građenja može obavljati samo pravno lice koje je registrovano za obavljanje te djelatnosti i koje posjeduje licencu Ministarstva ili Federalnog ministarstva prostornog uređenja.

Član 3.

(1) Uvjeti i mjerila za davanje licence odnose se na:

- minimalan broj stručnih lica i njihovu stručnu osposobljenost u rukovođenju radova,
- minimalan broj stručnih lica i radnika iz struke, te njihovu stručnu osposobljenost za pojedine radove koje obavlja izvođač,
- tehničku i drugu opremljenost za poslove koje obavlja izvođač u skladu sa registrovanom djelatnošću,
- uspostavljen sistem osiguravanja kvalitete,
- poštivanje principa održivog razvoja i zaštite okoliša.

(2) Izvođač ispunjava uvjete stručne osposobljenosti i broja radnika za obavljanje djelatnosti građenja građevina ili pojedinih dijelova građevina i zahvata ako zapošljava:

- najmanje jedno lice koje ispunjava uvjete za voditelja radova te građevine,
- najmanje tri lica koja ispunjavaju uvjete za obavljanje poslova predradnika odnosno poslovođe,
- najmanje osam lica s petim, četvrtim odnosno trećim stepenom obrazovanja za svako zanimanje potrebno za izvođenje radova za koje se licenca daje,
- najmanje osam lica s drugim i prvim stepenom obrazovanja za svako zanimanje potrebno za izvođenje radova za koje se licenca daje,
- najmanje pet lica s odgovarajućim stepenom obrazovanja za rukovođenje sredstvima rada (mašinama, uređajima i/ili opremom) potrebnim za izvođenje radova. Ako se sredstva rada osiguravaju putem ugovora o dugoročnoj saradnji tada nije potrebno ispuniti uvjet stručne osposobljenosti u pogledu lica koja rukuju tim sredstvima rada,

- ukupan broj radnika ne može biti manji od 25.

(3) Izvođač ispunjava uvjete stručne osposobljenosti i broja radnika za izvođenje građevina koje nemaju više od podruma, prizemlja i dvije nadzemne etaže i čija ukupna površina ne prelazi 400 m² i/ili za izvođenje pojedinih dijelova građevina ako zapošljava:

- najmanje jedno lice koje ispunjava uvjete za voditelja radova tog dijela građevine,
- najmanje dva lica koja ispunjavaju uvjete za obavljanje poslova predradnika odnosno dvaposlovođe,
- najmanje četiri lica s petim, četvrtim odnosno trećim stepenom obrazovanja za svako zanimanje potrebno za izvođenje radova za koje se licenca daje,
- najmanje četiri lica s drugim i prvim stepenom obrazovanja za svako zanimanje potrebno za izvođenje radova za koje se licenca daje,
- najmanje dva lica s odgovarajućim stepenom obrazovanja za rukovođenje sredstvima rada (mašinama, uređajima i/ili opremom) potrebnim za izvođenje radova. Ako se sredstva rada osiguravaju putem ugovora o dugoročnoj saradnji tada nije potrebno ispuniti uvjet stručne osposobljenosti u pogledu lica koja rukuju tim sredstvima rada,
- ukupan broj radnika ne može biti manji od 12.

(4) Voditelj radova iz stava (2) alineja 2. i stava (3) alineja 2. ovog člana mora biti inženjer (VI stepen) sa pet godina radnog iskustva u struci.

(5) Predradnik, odnosno poslovođa može biti osoba sa petim ili četvrtim stepenom stručne spreme i pet godina radnog iskustva.

(6) Izvođač ispunjava uvjete tehničke opremljenosti za obavljanje djelatnosti građenja određene građevine ili za izvođenje pojedinih radova na građevini ako raspolaže odgovarajućim građevinskim mašinama, uređajima i napravama, građevinskom i drugom opremom, prevoznim sredstvima, ili ako se ta sredstva rada osiguravaju putem ugovora o dugoročnoj saradnji, te poslovnim prostorom potrebnim za obavljanje poslova za svaku vrstu radova za koje se traži licenca i potrebnim za tehnološki primjereno izvršenje radova.

(7) Uvjet tehničke opremljenosti podrazumijeva i opremu za zaštitu radnika na radu i zaštitu od štetnih djelovanja za sva lica koja se stalno ili povremeno nalaze na gradilištu i opremu za zaštitu od štetnih djelovanja na okoliš ukoliko takva djelovanja postoje.

Član 4.

Licence iz člana (1) ovog Pravilnika izdaju se po zahtjevu pravnog lica koje se bavi građenjem građevina i/ili izvođenjem pojedinih radova.

Član 5.

(1) Zahtjev za izdavanje licence za građenje građevina i drugih zahvata u prostoru sadrži:

- naziv pravnog lica,
- sjedište i adresu pravnog lica,
- ovjeren izvod iz sudskog registra sa rješenjem o upisu u sudski registar, identifikacionim brojem i šifrom djelatnosti,
- dokaze o ispunjavanju uvjeta stručne osposobljenosti i broja radnika,
- akt nadležnog organa o ispunjavanju uvjeta u pogledu tehničke opremljenosti i osiguranja poslovnog prostora,
- potvrdu nadležnog tijela koja nije starija od šest mjeseci da odgovorno lice izvođača u posljednje tri godine nije pravomoćno osuđivano za krivično djelo čija je priroda u vezi s obavljanjem djelatnosti građenja.

(2) Dokazom o ispunjavanju stručne osposobljenosti i broja radnika u smislu stava (1) alineja 4. ovog člana smatraju se:

- za sve zaposlene radnike tabelarno prikazani podaci o:

- (a) ukupnom radnom iskustvu,
- (b) majstorskim diplomama ili o priznatom majstorskom statusu,
- (c) svjedočanstvima o završnom spitu, diplomama,
- (d) uvjerenjima o položenom stručnom ispitu,
- (e) uvjerenjima o stručnoj osposobljenosti,

- potvrda nadležne ustanove penzijskog i zdravstvenog osiguranja o urednom podmirenju obaveza.

(3) Dokazima o ispunjavanju uvjeta tehničke opremljenosti u smislu stava (1) alineja 5. ovog člana smatraju se:

- popis osnovnih sredstava rada,
- ugovor o dugoročnoj saradnji radi osiguravanja sredstava rada.

Član 6.

(1) Zahtjev za izdavanje licence za građenje građevina i drugih zahvata u prostoru se podnosi Ministarstvu.

(2) Za razmatranje zahtjeva iz stava (1) ovog člana, Ministar imenuje stručnu komisiju.

(3) Stručna komisija iz prethodnog stava ocjenjuje validnost dokumentacije iz člana 5. ovog Pravilnika, te predlaže Ministru, ukoliko su ispunjeni svi propisani uvjeti za obavljanje djelatnosti građenja, da donese odgovarajuće rješenje o ispunjavanju uvjeta.

(4) U slučaju zaprimanja nepotpunog, neurednog zahtjeva ili zahtjeva koji sadrži neki formalni nedostatak, komisija iz prethodnog stava će predložiti Ministarstvu da pozove podnosioca zahtjeva da u određenom roku otkloni nedostatke.

(5) Stručna komisija o svom radu vodi zapisnik.

Član 7.

Pravno lice sa sjedištem izvan Kantona mora biti registrovano za obavljanje djelatnosti građenja građevina i drugih zahvata u prostoru, te posjedovati licencu za obavljanje registrovane djelatnosti izdatu od strane nadležnog organa kantona, ukoliko njihovi propisi to nalažu, ili ovlaštenje/licencu za obavljanje djelatnosti građenja građevina izdatu od strane Ministarstva za urbanizam, prostorno uređenje i zaštitu okoline Bosansko-podrinjskog kantona Goražde ili Federalnog ministarstva prostornog uređenja.

Član 8.

(1) Na prijedlog stručne komisije iz člana 6. ovog Pravilnika, Ministarstvo u roku od 30 dana, od dana podnošenja zahtjeva od strane pravnog lica, donosi rješenje o ispunjavanju uvjeta iz člana 3. ovog Pravilnika, bez kojeg izvođač ne može otpočeti obavljanje djelatnosti za koju je registrovan.

(2) Protiv rješenja iz stava (1) ovog člana ne može se izjaviti žalba, ali se može pokrenuti upravni spor kod nadležnog suda u roku od 30 dana od dana prijema istog.

(3) Na osnovu pravosnažnog rješenja iz stava (1) ovog člana, Ministarstvo izdaje licencu za obavljanje djelatnosti građenja, na obrascu prikazanom u Prilogu 1. ovog Pravilnika i čini njegov sastavni dio.

(4) Licence iz prethodnog stava objavljuju se u „Službenim novinama Bosansko-podrinjskog kantona Goražde“.

Član 9.

(1) Licenca se daje na period od pet godina, a pravno lice koje dobija licencu dužno je Ministarstvo obavijestiti o svim promjenama u pravnom licu, koje utiču na ispunjenost uvjeta za dobijanje licence.

(2) Na zahtjev pravnog lica licenca se može produžiti. Zahtjev za produženje licence podnosi se najranije godinu dana, a najkasnije dva mjeseca prije isteka roka važenja licence. Zahtjev za produženje licence podnesen prije navedenog roka odbacit će se.

(3) Izvođač je dužan u roku od 15 dana od dana nastale promjene od Ministarstva zatražiti izmjenu licence, ako su se naknadno promijenili podaci na temelju kojih je licenca izdata, na način da izvođač više ne ispunjava uvjete propisane ovim Pravilnikom za obavljanje poslova građenja, za koje je licencu dobio.

Član 10.

(1) Licenca se oduzima kada se naknadnom provjerom, od strane Ministarstva ili nadležne inspekcije, utvrdi da pravno lice poslove građenja obavlja suprotno važećim propisima, da je prestalo da ispunjava uvjete pod kojima je licenca izdata, odnosno ako je izdata na osnovu neistinitih ili netačnih podataka.

(2) Rješenje o oduzimanju licence donosi Ministarstvo i pored podataka propisanih zakonom, sadrži i rok na koji se licenca oduzima.

(3) Ukoliko je licenca oduzeta zbog prestanka ispunjavanja uvjeta za izdavanje licence, može se podnijeti zahtjev za izdavanje nove licence kada se ispune određeni uvjeti.

Član 11.

O izdavanju, produženju, izmjeni i/ili dopuni i oduzimanju licence obavještava se nadležna inspekcija.

Član 12.

(1) Troškove utvrđivanja ispunjavanja uvjeta za obavljanje djelatnosti građenja snosi podnosilac zahtjeva.

(2) Troškovi postupka iz stava (1) ovog člana iznose 300 KM, a uplata se izvršava na: JRT BPK Goražde broj: 132-731-04102931-54, sa vrstom prihoda: 721121 i šifrom budžetske organizacije: 2301001. Pored troškova postupka, podnosilac zahtjeva je dužan platiti i troškove administrativne takse.

(3) Licenca, njeno produženje, izmjena i/ili dopuna neće se izdati izvođaču bez dostavljenog dokaza o izmirenju troškova iz stava (2) ovog člana.

Član 13.

Postupak izdavanja licence, produženja rokova važenja, izmjene i/ili dopune ili oduzimanje licence, vodi se po odredbama Zakona o upravnom postupku („Sl. novine Federacije BiH“, broj: 2/98).

Član 14.

(1) Ministarstvo vodi registar izvođača kojima je data, produžena, izmjenjena i/ili dopunjena licenca.

(2) Registar iz stava (1) ovog člana sadrži:

- redni broj upisa,
- datum upisa,
- naziv i sjedište pravnog lica,
- broj i datum izdavanja rješenja o ispunjavanju uvjeta za obavljanje djelatnosti izgradnje građevina ili pojedinih dijelova građevine, odnosno za produženje, izmjenu i/ili dopunu rješenja,
- broj i datum izdavanja licence,
- vrstu stručnih poslova za izvođenje radova,
- popis i stručnu spremu zaposlenih,
- promjene bitne za obavljanje stručnih poslova na izvođenju radova (izmjena podataka o pravnom licu, prestanak rada pravnog lica itd.).

Član 15.

Pravno lice koje je bilo, prije donošenja ovog Pravilnika, registrovano za obavljanje djelatnosti građenja, nakon donošenja ovog Pravilnika dužno je odmah podnijeti zahtjev za dobijanje licence, a do izdavanja licence može nastaviti obavljanje djelatnosti za koju je registrovano.

Član 16.

Ovaj Pravilnik stupa na snagu danom donošenja, a naknadno će biti objavljen u „Službenim novinama Bosansko-podrinjskog kantona Goražde“.

Broj: 09-23-1- 123/10
Goražde, 15.03.2010. godine

MINISTAR

Vladimir Nedimović, dipl. pravnik

Na ovaj Pravilnik saglasnost je dala Vlada Bosansko-podrinjskog kantona Goražde svojom Odlukom broj: 03-23-374/10 od 09.03.2010. godine.

PRILOG 1.

BOSNA I HERCEGOVINA
FEDERACIJA BOSNE I HERCEGOVINE
BOSANSKO-PODRINJSKI KANTON GORAŽDE
MINISTARSTVO ZA URBANIZAM, PROSTORNO UREĐENJE
I ZAŠTITU OKOLINE



Na osnovu člana 8. stav 3. Pravilnika o definisanju minimalnih kadrovskih i materijalno-tehničkih uvjeta koje moraju ispunjavati izvođači da bi dobili licencu za obavljanje djelatnosti građenja ("Službene novine Bosansko-podrinjskog kantona Goražde", br. 4/10), Ministarstvo za urbanizam, prostorno uređenje i zaštitu okoline Bosansko-podrinjskog kantona Goražde **i z d a j e**:

L I C E N C U
*za obavljanje djelatnosti građenja građevina i/ili
izvođenja pojedinih radova na građevini i drugih
zahvata u prostoru*

(naziv pravnog lica, adresa, sjedište) ispunjava uvjete za obavljanje djelatnosti građenja (vrsta djelatnosti) na području Bosansko-podrinjskog kantona Goražde.

Broj:
Goražde,

Licenca se izdaje za period:

MINISTAR
